

“Apan ang Manlalaban, nga mao ang Balaan nga Espiritu, kang kinsa gipadala gikan sa Amahan pinaagi sa Akong ngalan, Siya magatudlo kaninyo sa tanang butang ug magapahinumdom kaninyo sa tanang butang nga gikasulti Ko nganha kaninyo”
(Juan 14:26)

Ang Balaan nga Espiritu dili usa ka hinungaw nga gahum sa Dios ug dili usab Siya ingon nga wala magalungtad, tungod kay nagalungtad na Siya sa kanhi pang kapanahonan ingon nga persona(Hebrohanon 9:14). Siya adunay hamulag nga pagkapersona sa Amahan ug sa Anak. Apan wala kana magpasabut nga adunay tutulo ka Dios kondili Usa lamang apan nagpadayag sa tutulo (Santiago 2:19, Mateo 28:19).

Dinhi nianing nga pagtuon atong pamatud-an ang pagkapersona sa Balaan nga Espiritu ingon nga pagdependa batok sa pagtulon-an sa mga nanagpatawag nga saksi ni Jehovah ug uban pang pundok nga nanagsalikway sa pagkapersona sa Balaang nga Espiritu.

A. Mga termino nga kagikan.

- **Balaan** nga sa Grego nga pinulongan “hagios” nga nagpasabut ug lunsay, way ikasaway, hinlo o balaan.
- **Espiritu** nga sa Grego nga pinulongan “pnuema” nagpasabut ingon nga huyohoy sa hangin o gininhawa (Juan 3:8)
- Diha sa Hebrohanon 1:2 ang **Persona** sa Grego nga pinulongan “hupostasis” nga nagpasabut ug kinaiya, kinasul-oran nga bahin, esensya.

B. Mga aspeto o gilangkuban sa usa ka persona.

1. **Kabubut-on** – ang kagahum sa paghimo ug kabuot, kagustohan sa pagpili ug pagpugong usab. (Webster Illustrated Contemporary Dictionary pg.847)
2. **Kahibalo** – ang kahimtang sa pagka-adunay kahibalo ug pagsabut (Webster Illustrated Contemporary Dictionary pg.398)
3. **Pagbati** – bisan unsang pagbati, kusog o hilabihan pagbati, sama sa gugma, kalipay, kahadlok ug uban pa. (Webster Illustrated Contemporary Dictionary pg.232)

C. Ang Balaan nga Espiritu usa ka persona kana tungod kay:

1. Aduna Siya’y kaugalingon nga kabubut-on (1 Corinto 12:11; Hebrohanon 2:4) Ang pagpili kay Pablo ug Barnabas sa pagpamuhat sa bulohaton sa Dios maoy usa ka pamatuod usab sa kaugalingon kabubut-on o kagustohan sa Balaan nga Espiritu (Buhat 13:2)
2. Adunay Siya’y kaugalingon nga kahibalo (Isaias 11:2; 40:13-14; 1Corinto 2:10-11), sa 1Corinto 12:8 ang Balaan nga Espiritu nagahatag ug kahibalo ug kaalam, karon kung wala Siya’y kahibalo nan unsa man ang ikahatag sa Balaan nga Espiritu? Dungag pa dili tanan binuhat nga dunay lawas matawag nga persona sama sa mga mananap, tungod kay walay kahibalo o pagsabut ang mga mananap (Salmo 32:9) ang anaa kanila mao lamang ang natural nga kinaiyahan sa pagka-mananap kon gitawag nga “instinct” sa eninglis.
3. Adunay Siya’y kaugalingon nga pagbati (Isaias 63:10; Roma 15:30; Efeso 4:30) nianang mga bersikuloha atong makita ang nagpadayag sa nagkadaiyang pagbati sa Balaan nga Espiritu. May pagbati Siya sa kasuko, kaguol ug paghigugma nga diin usa sa mga gilangkuban sa pagkapersona.

Atong madayag nga ang Balaan nga Espiritu tataw ug klaro gayud nga usa ka persona bisan Siya walay lawas nga makita kana tungod kay ang mga aspeto sa pagka-persona gihuptan man usab Niya. Apan kung ipangulipas ug supakon man kini sa mga nanapatawag ug saksi ni Jehovah ug uban pang pundok nga sama nila ug pagtoo, nan, angayan usab nga ilang ipangulipas ug dili toohan ang pagkapersona sa Dios tungod kay ang Dios Espiritu man(Juan 4:23-24) ug angayan usab nga ilang ipangulipas ug dili toohan ang pagka-persona sa mga manulonda nga espiritu (Salmo 104:4; Hebrohanon 1:7,14)ug si Satanas nga usa ka dautang espiritu (1Samuel 16:14; Lucas 8:2). Apan mismo sa ilang mga pagtoon nagatoo sila sa Dios isip usa ka Espiritu ug sa mga manulonda nga mga balaan ug dautan nga mga espiritu ingon nga mga persona, karon atong makita nga sila gibutaan gayud ug anaa sa dakung kalibog.

D. Ang Balaan nga Espiritu kauban sa Amahan ug sa Anak adunay tupong nga kahimtang sa oturidad sa pagka-Dios.

- Diha sa pagpamautismo (Mateo 28:190

- Sa pagpanalangin o benediksyon sa pag-ampo sa mga apostoles (2 Corinto 13:14)
- Sa pagtrabaho sa kaluwasan sa tao (1Pedro 1:2)

E. Ang Balaan nga Espiritu lahi nga persona sa Dios Amahan. (Juan 15:26; 14:26; Galacia 4:6) , dayag kana sa mga pulong nga **“gipadala gikan sa Amahan”** sama sa pagkasulti sa atong Ginoong JesuCristo nga Siya gipadala usab gikan sa Amahan (Juan 6:38)

F. Ang Dios Anak lahi nga persona sa Balaan nga Espiritu. Ang Ginoong Jesus mitawag sa Balaan nga Espiritu ingon nga LAING MANLALABAN (Juan 14:16-18), sa lain panid ang Ginoong Jesus usab miingon nga AKONG IPADALA KANINYO GIKAN SA AMAHAN (Juan 15:26).

G. Ang personal nga Panlalaki kasarian nga pantawag gigamit usab isip paghisgut sa Balaan nga Espiritu.

- ❖ Ang pulong Espiritu wala kanay kasarian sa panlalaki kon panbabae, apan ang panlalaki nga kasarian nga pantawag gigamit ngadto sa Balaan nga Espiritu matud sa Atong Ginoong Jesu-Cristo **“SIYA** (sa eninglis **HE** nga ginagamit sa panlalaki nga kasarian pantawag) **magapanghimatuod kanako”..(Juan 15:26)**, mabasa usab ang paggamit sa panlalaki nga kasarian pantawag sa Juan16:7,8,13,14 ug Roma 8:16,26.

H. Ang aplikasyon sa panlalaki sa ngalan sa Grego nga **“Parakletos”** ngadto sa Balaan nga Espiritu.

- PARAKLETOS sa Grego ug MANLALABAN sa Binisaya diha sa Juan 14:26; 15:26; 16:7
- Ang ngalan nga PARAKLETOS dili mahimo nga hubarong “laban” o himoong ngalan sa bisan unsang butang nga dili persona. Ang MAGHUHUPAY, MAGTUTUDLO, PATRON, MANLALABAN, kang kinsang termino nga nagapakita kanato ingon nga ginagamit sa usa ka persona.

Ang Buhat 2:4 nga nagkanayun **“NAPUNO SA BALAAAN NGA ESPIRITU”**, ginamit sa mga nanagsupak sa pagkapersona sa Balaang nga Espiritu, apan wala kana magpasabut nga ang Balaan Espiritu dili persona kundili hinoon gipasabut diha nga

silang nangapuno sa gasa nga gikan sa Balaan nga Espiritu diin sila nanagpanulti ug mga dila ug nanagpangayo mga masakiton ug uban pa, basaha usab Buhat 2:6-11 ug 1Corinto 12:1-4.

- I. Ang mga trabaho sa Balaan nga Espiritu nagapamatuod usab sa Iyang pagka-persona.
- Nagasusi Siya sa mga halalum nga mga butang sa Dios (1Corinto 2:10)
 - Musulti Siya (Mateo 10:20; Buhat 10:19-20; 13:2; Pinadayag 2:7,11)
 - Mutudlo Siya (Lucas12:12; Juan 14:26; 1Corinto 2:13)
 - Mumando Siya (Roma 8:14)
 - Magpataliwala Siya (Roma 8:14-16,26)
 - Nagapanghatag Siya ug mga gasa (1Corinto 12:7-11)
 - Mutawag Siya ug mga tao alang sa diosnong buluhaton (Buhat 13:2; 20:28)
 - Mobuhi Siya ug mobag-o (Juan 6:63; Titu 3:5)
 - Magbubuhat Siya (Genesis 1:2; Job 33:4; Salmo 104:30)
 - Makigbatok Siya (Genesis 6:3)
 - Maglihok Siya (Genesis 1:2)
 - Mogiya Siya (Juan 16:13)
 - Mutabang Siya (Roma 8:26)
 - Musaksi Siya (Juan 15:26; Roma 8:16)
 - Magpadayag Siya (Efeso 3:5)
 - Muhatag ug pagtaga (1Timoteo 4:1)
 - Magabalaan Siya ug tao (1Corinto 6:11)
 - Nagahatag Siya ug Kahibalo (1Juan 2:27)
 - Musulti Siya pinaagi sa lain nga tao (Marcos 13:11)
 - Anaa Siya mupuyo sa tanang linuwas (Efeso 2:22)
 - Mubanhaw Siya (Roma 8:11)
 - Mubadlong Siya (Juan 16:7-8)
 - Makig-ambitay Siya (2Corinto 13:14)
 - Magapanghimatuod sa kaluwasan (Roma 8:16)
 - Muselyo Siya sa mga nangaluwas(Efeso 1:13)

Matud pa sa mga magsusupak sa pagka-persona sa Balaan nga Espiritu nga “ kon tinuod pa nga persona ang Balaan nga Espiritu nan nahimo silang kambal ni Juan nga Bautista sa Lucas 1:14-15? Ang tubag mao kini- ang Balaang presensya lamang sa Balaan nga Espiritu ang anaa kang Juan, buot ipasabut ang iyang mga espirituhanong gasa diha kang Juan nga Bautista, kay ang

Roma 8:9 atoa usab diay sabton nga ang tanang mga linuwas Kambal usab diay ni Ginoong Jesus? Kana dili gayud mahimo.

- J. Ang mga kinaiyahan o kinatibuk-an sa Pagka-Dios sa Dios Amahan ug Dios Anak gihuptan usab sa Balaan nga Espiritu.
1. Ang dayun nga paglungtad (Hebrohanon 9:14)
 2. Omnisyente o ang pagkahibalo sa tanang butang (1Corinto 2:11; Isaias 11:2)
 3. Omnipresente o ang pagka-anaa sa tanang dapit (Salmo 139:7-10)
 4. Kamatuoran (Juan 16:13)
 5. Gugma (Roma 15:30)
 6. Pagka-Balaan- ang pulong balaan nga nakapangalan sa Balaan nga Espiritu nagpang-himatuod sa Iyang pagkabalaan.
 7. Omnipotente o ang pagkagamhanan (Genesis 1:2; Job 33:4; Salmo 104:30; Roma 15:13, 19)
 8. Kinabuhi (Roma 8:2)
 9. Pagka-Magbubuot (Juan 3:8; 1Corinto 12:11; Hebrohanon 2:4)

Kining mga kinaiyahan nga gihuptan sa Balaan nga Espiritu nagpamatuod sa Iyang persona isip usa ka Dios nga makagagahum ug dungag pamatuod niana mao kining musunod nga bersikulo (Buhat 5:3-4; 1Corinto 3:16; 6:19; 2Corinto 3:17).

Miabut na kita sa pagtapus niining atong pagtoon ug atong napamatud-an nga tinuod nga persona gayud ang sa Balaan nga Espiritu, apan kining mga pundok nga mga tinukod lamang ug mga tao nalibog ug nasayup mahitungod sa kamatouran bahin sa pagka-persona sa Balaan nga Espiritu. Ang pagpangulipas ug pagkasayup maoy usa usab ka pagtampalas ug pagpasipala saBalaang nga Espiritu sa Dios(Mateo 12:31-32).

Kung adunay kay mga pangutana o buot ka ba nga bisitahan sa inyong panimalay etext ning Numero

09556144793

Bisita ka sa mga Berea, Landmark, Sovereign Grace Baptist Churches sa inyong haduol nga dapit.

Pastor/worker: _____

Address: _____



Basaha ug ton-i uban sa imong Bibliya

JUNREY J. MONCADA
BEREA BAPTIST CHURCH
SABANG, CABURAN BIG,
JOSE ABAD SANTOS, DAVAO OCCIDENTAL